

61445/1^p

DISPUTATIO MEDICA

INAUGURALIS

DE

PNEUMONIA.

DISPUTATIO MEDICA

INAUGURALIS,

DE

PNEUMONIA;

QUAM,

ANNUENTE SUMMO NUMINE,

EX AUCTORITATE REVERENDI ADMODUM VIRI,

D. GEORGII BAIRD, SS. T. P.

ACADEMIÆ EDINBURGENÆ PRÆFECTI;

NECNON

AMPLISSIMI SENATUS ACADEMICI CONSENSU, ET

NOBILISSIMÆ FACULTATIS MEDICÆ DECRETO;

PRO

GRADU DOCTORIS,

SUMMISQUE IN MEDICINA HONORIBUS AC PRIVILEGIIS

RITE ET LEGITIME CONSEQUENDIS;

ERUDITORUM EXAMINI SUBJICIT

JOHANNES FINN,

HIBERNUS:

Ad diem 24. Junii, horâ locoque solitis.



EDINBURGI:

EXCUDEBANT ADAMUS NEILL ET SOCIJ.

MDCCCII.



SYLVERIO MORIARTHY,

ARMIGERO,

PRÆFECTO CLASSIS REGIÆ,

NON SOLUM

REBUS MARITIMIS PERITISSIMO,

SED NON MINUS

LITERIS HUMANIORIBUS,

VITÆ INTEGRITATE,

ET MORUM URBANITATE,

CONSPICUO,

HAS STUDIORUM PRIMITIAS

D. D. C.QUE

JOHANNES FINN.

Digitized by the Internet Archive
in 2018 with funding from
Wellcome Library

<https://archive.org/details/b30382208>

DISSERTATIO MEDICA

INAUGURALIS

DE

P N E U M O N I A.

HIC morbus in species duas, Peripneumoniam, nempe, et Pleuritidem, ab antiquis divisus fuit ; et omnes fere nosologi, sicut a CULLENO cel. notatur, eorum exemplum ad hoc nostrum usque tempus sequuti sunt. Inflammatio, quâ pleura costalis afficitur, illo,

A

ea

ea autem, quæ in substantia pulmonum parenchymatosa domicilium habet, hoc nomine ab iis nuncupata fuit. Morbum, quo, secundum veteres, pleura costalis tentata fuit, pleuram pulmones cingentem sæpius occupare, cadaverum sectione patet. Sed etiam si, duas, diversasque mali sedes esse concedamus, difficillime quidem distinguuntur; et, quoniam species utraque iisdem medicamentis cedit, sub Pneumoniæ nomine de ea agere volo.

Definitionem sequentem tradit CULLENUS:

“ Pyrexia; dolor in quadam thoracis parte;
“ respiratio difficilis; tussis.”

SYM-



SYMPTOMATUM NARRATIO.

CUM stadio frigido morbus semper fere incipit. Omnia pyrexiae signa adfunt. In principio, pulsus validus, durus atque frequens est; sed, in mali progressu, aut ubi symptomata infausti ominis jamjam exitium ferre certum videntur, mollis, debilis, irregularis fit. Dolor in regione thoracis admodum gravis, ægrotantem vexat. Inspiratione plenâ augetur; pulmones enim haud facile dilatantur. Dolor rarò fixus est. Nunc sternum, nunc dorsum, claviculamque adoritur. Sed costæ nothæ præcipue vix unquam vim morbi fugiunt. Nonnulli, viscera abdominalia aliqua,

qua, plùs, minùs lædi scribunt *. Costâ sextâ, vel septimâ, ubi malum graviùs urget, semel jam correptis, ibidem immobile regnat, et ab ipso ægro perquam distinctè percipi atque designari potest. Ponderis potius quàm doloris sensus interdum sentitur. Partes eadem pœnas plerumque luunt : hinc tamen angor, a latere, scapulam versus, inde a sternò ad claviculam, et vice versâ, sese sæpe diffundit. Tussis gravis atque terribilis hæc omnia consequitur, ægrumque absque induciis torquet. Sputa nonnunquam decolora evadunt, interdum sanguine tinguntur ; nunc spissa et purulenta, nunc viscida atque tenuia rejiciuntur ; inter tussendum potissimùm manifestantur. Ab ipso morbi initio, respiratio difficilis est, et sæpe quidem intolerabilis, nisi æger erecto

* BAILLIE'S Morbid Anatomy.

erecto sit corpore. Si super latere non affecto etiam forte decumbat, inspiratio plena sensum antea molestum magnopere auget, et in hoc, sicut in aliis morbis inflammatoriis, sanguis missus crustam coriaceam induit. Hoc tamen interdum non accidit, eoque medicos, ne decipiantur, cautos esse oportet. Facies, oculi, faucesque, rubrum ostendunt colorem. Vultus anxietatem summam jugiter præ se fert. Oculi aquosi fiunt, et etiam suffunduntur. Lingua aret, mucoque viscido atque flavo obducitur. Anorexia, nausea, cephalalgia, querelas hæc nunquam non fere comitantur. Quum jam vires eò usque inflammatio acquirat, ut remedia nostra nil, aut parùm, prodesse videantur, oculorum languor, delirium, coma interdum, extremitatum frigiditas, labiorum pallor, vel albor potius, pulsus debilis, celer, intermittens, respiratio difficillima,—hæc omnia citum mortis gradum prænunciant. Vi-
ribus

ribus tandem deficientibus, fudor circa caput
pectusque tantùm erumpit; nil diutius ex-
puendo ejicitur; membra convelluntur; et
suffocatio ægri miseriis coronidem imponit.

DE



DE MORBI TERMINATIONIBUS.

PNEUMONIA vel in resolutionem, suppurationem, gangrænam, vel sanguinis ferive in vasa bronchialia effusionem, semper definit. Morbus resolvi dicitur, quum pulmonibus, eorumque vasis integris, sponte quasi cesset. Quòd ita quidem terminatur, etiam absque artis medicinæ auxilio, cadaverum sectionibus luculenter admodum colligimus. Nam in iis, quibus, aliorum morborum vi, vita erepta fuit, pleuram costalem inter, pulmonesque, adhæsiò reperta est, quanquam, dum aures vitales carpsent, eos pneumoniâ laborâsse, nemo unquam suspicatus esset. Attamen, cauti at-

que

que prudentis medici est, summis viribus niti, ut nil, quod ægro levamen afferre videatur, intentatum relinquat. Si morbus vim sponte remiserit, ante diem septimum hoc plerumque contingit; et, quoniam ejus violentiam, ægrique vires, hîc semper respicere necesse est, resolutionis tempus sæpe variare observamus. Talis mali finis rarissime expectanda est, nisi evacuatio aliqua præcedat. Nil autem tantum secum affert levaminis, quantum sputum spissum, albidum, et leviter sanguine tinctum. Urinæ sedimentum copiosum deponentis profusio, fluxus sanguinis e naribus, vel vasis hæmorrhoidalibus, vel diarrhœa biliosa, resolutioni magnopere favere dicuntur. Si pulsus tardior evadat; si calor, aliaque symptomata vim suam remittant, faustam facilemque terminationem adesse plerumque sperare audemus. Quando pus in telam cellulosam, vel in parenchyma pulmonum effunditur,

ditur,

ditur, morbus in suppurationem definere dicitur. Hæc sane expectanda est, quum symptomata solita per quatuordecim dierum spatium remaneant, dolor diutius non sæviat, et, dyspnœâ adhuc ingente, expectoratio paululum tantùm augeatur. Horrores, sudores circa caput, cordisque regionem, tussis sicca, oppressionis et ponderis in thorace sensus, pulsus frequentior pleniorque, idem nobis designant. Suffocatio interdum subita, vel empyema, vel, quæ non minus timenda est, phthisis pulmonalis, hæc omnia sequuntur. Gangræna, ut a CULLENO cel. notatum est, rariùs quidem quàm vulgò creditur, scenam claudit. Sed si semel inducta fuerit, exitium certissimum trahit. Cruciatus ægri subitò cessantes, sputa sanguine, vel materie quâdam nigrâ, mista, halitus oris fœtidissimus, oculorum suffusio, vultus tristis, fellæ plurimæ, virides, fœtoreque ingrato, urina rubra sedimentum nigrum

B deponens,

deponens, gangrænam in limine ostendunt. Deficientibus interea viribus, debilitas summa systema totum corripit; extremæ corporis partes frigent; dum delirium mite, tendinumque subsultus, ægrotantis miseriis finem tandem imponunt. Terminatio mali hujusce quarta et usitatissima est effusio, quæ plerumque lethalis evadit. Vasis etenim pulmonum ruptionem passis, sanguinis vel feri pars in vesiculas hoc modo effusa, suffocationem nimirum faciliè inducit. Signis sequentibus, forsitan, talis rerum eventus haud malè notabitur. Vires subito imminuuntur, facies fit livida, dum dolor omnis improvisò cessat. Intolerabilis oppressio sensatio adest, quum expectoratio interim nulla omnino fit. Bronchiis obturatis, hæc symptomata mors brevi subsequitur.

DIA-



DIAGNOSIS.

Hic ab omnibus aliis morbis, pneumoniâ, quæ *nothâ* dicitur, exceptâ, facilè plerumque distinguitur. Pro Catarrho, tamen, interdum sumitur ; quando, nempe, symptomata admodum levia sunt, ita ut medicus, summo periculo jam imminente, tandem, et forsan serò nimis, accersatur. Ne decipiamur, singula rite perpendamus. Lateris dolori, inspiratione plenâ, tussique aucto, mentem præcipue adhibeamus. Si affectio hæcce, quanquam in principio haud gravis, absque induciis plus minus urgere progrediatur, morbi adventus maximè timendus est, eoque magis, quum respiratione

spiratio difficilis, pulsusque duri et validi sint.—Hepatitidem nonnunquam pneumonia æmulatur. Facile tamen dignosci queunt. Nam in illa, saltem his nostris regionibus, nec dolor, nec pyrexix signa ægrum tantopere vexant. Illâ insuper laborantes in latus affectum, dextrum scilicet, plerumque cubant; quum hâc tentati facillimè supini decumbunt. Tussis etiam sicca illam, humida autem hanc comitatur. In hac, angor perpetuò sedem mutat, sed in illa fixus manet, nisi quòd claviculam, humerique dextri summum versus ascendit. Tensio denique dolorifica lateris tentati, tussis sicca, cutis nonnunquam flavedo, singultus, vomitusque, quæ omnia illam nunquam non ferè comitantur, diagnofin eam inter et hanc manifestant.—Hanc etiam a Gastritide, quam interdum imitari videtur, vomitione, singultu, tensione, doloreque epigastrii, et febre porrò typhoidea, utpote huic, gastritidi

tidi nempe, semper adhærentibus, discernere possumus. Cruciamentum partis thoracis sinistrae, pulsus inæqualis et intermittens, palpitatio et syncope, quæ sunt Carditidis symptomata, hanc et pneumoniam bene discriminant. Hæc in animo si ritè volvamus, morbi, de quo agimus, distinctio satis, ut opinor, manifesta apparebit.

CAUSÆ



CAUSÆ PRÆDISPONENTES

FIBRIS muscularibus densis rigidisque corporis totius, sed vaforum pulmonalium præcipue, secundùm plerofque, tribuendæ sunt. Juvenes, eosque medium vitæ curriculum agentes, sæpius quàm infantes aut senes, mares potius quàm fœminas, morbus adoritur. Rustici, præfertim si labore duro atque assiduo corpora exerceant, magis quàm otiosi enervatique, huic infortunio serviunt. Regionum illarum, quæ magnas frigoris calorisque vicissitudines subeunt, incolas, potissimum aggreditur. Verno, igitur, autumnalique tempore, in terrarum orbis plagis his nostris similibus, ditionem

ditionem frequentiùs obtinet. Temperamentum plenum atque sanguineum etiam mali fundamenta aliquatenus jacet. Omnia, igitur, quæ tali corporis conditioni favent, morbum hunc, magna ex parte, inducunt. Inter hæc, vita nimis lauta, immodicus vini vel spiritûs ardentis usus, evacuationum solitarum suppressio aut imminutio, recensentur; quæ omnia, quoniam diathesi phlogisticæ amica sunt, temperamentum jam dictum secum similiter ducunt. Aliorum morborum effectus, huic etiam homines magis obnoxios reddunt. Catarrhus, pulmonum tubercula, variola et morbilli, effectus tales post se relinquunt. Semel affecti citius quàm alii iterum corripuntur.

CAUSÆ



CAUSÆ EXCITANTES

HAUD semper manifestæ sunt. In iis, etenim, qui ad morbum proclives inveniuntur, levissimæ quidem, vix ægris ipsis, nedum medico cognitæ, eum interdum excitant. Multò autem evidentiores existunt, quum proclivitas in systemate non admodum valeat. Dupliciter in genere vim exercent suam. Imprimis, quæcunque pulmonibus ipsis applicata eos potenter stimulant, pneumoniæ ortum dare creduntur. Hæc sunt vapores acres, et veneno quasi imbuti, frigus, vel aër impurus, nimia pulmonum exercitatio, loquendo, canendo, vel instrumenta quædam musica inflando.

Déin,

Dein, ea, quæ partibus corporis externis adhibita, vim fere eandem possidere habentur. Ex his præcipua sunt vulnera pectori inflicta; frigus, humiditate præsertim stipatum, corpori calenti admotum. Frigoris insuper actione, vasa externa constringi experientia nos docet. Sic enim, perspiratione imminutâ, fluidorum circummeuntium quantitas augetur, impetuque eorum solito majore systema totum turbatur. Qui, conclavibus calidis exeuntes, cœlo frigido sese incauti objiciunt, si SWIETENIO cel. fides habeatur, temeritatis pœnas, hoc morbo impliciti, frequentissime luunt. Calor etiam frigori magno præcipue succedens, inter causas excitantes enumerantur.



PROGNOSIS

NONNUNQUAM anceps est. Sed si remedia maturè adhibeantur, si symptomata non admodum sæviant, ægerque ab affectionibus aliis immunis sit, faustum morbi eventum sperare licet. Si aliqua resolutionis signa adeste videantur, spes eò major accedit. Si certamen dubium, feliciter tamen, definat, hoc primâ hebdomade plerumque contingit. Sed in casibus quibusdam mitibus, non nisi sub septimanæ secundæ finem idem interdum evenit. Terminationem felicem resolutioni tandem tribuendam, ad diem vicesimum quartum, usque, in quibusdam medicinæ factis protrac-

tum.

tum esse invenimus. Si sputa libera et copiosa, symptomata cætera mitia sint, somno reficiente fruatur ægrotans, plenamque inspirationem, absque incommodo, haurire queat, fitis et calor haud multum vexent, tum quidem de eventu felici vix hærere possumus. Hæc malè ominari dicuntur. Pyrexia vehemens, delirium ferox, dolor thoracis pungens, qui sese latè diffundit, respirationem præpedit, a tussique frequenti et molesta incrementum capit. Si spiritus insuper difficiliùs ducatur, adeò ut neque supinus, neque in latus miser decumbere valeat, periculum maximum imminet. Hæc autem pessimè nos sperare faciunt; facies turgida, sudores circa caput pectusque tantum erumpentes, pulsus irregularis, expectoratio multum imminuta, aut nulla omnino, coma, stupor, et tendinum subsultus, quæ denique scenam claudunt. Quando morbus exitum

tium affert, inter tertium septimumque diem ægrotans plerumque morte mulctatur. Res tamen nonnunquam non ita se habet.

ME-



METHODUS MEDENDI.

PNEUMONIÆ mederi duabus methodis medici conantur. Vascularum igitur sanguiferorum corporis totius, sed præcipue partis inflammatae, vim auctam, primâ, imminuere ; secundâ, inflammatione aliquatenus subactâ, expectorationem promovere, tussimque mitigare, tentant.

Ut indicationis primæ compotes fiamus, venæsectio, purgatio, et quaecunque diathesin phlogisticam subigere inveniuntur, diligenter adhibenda sunt. Sed sanguinis missio, ut inter auctores omnes convenit, omnibus generis hujusce remediis meritò præfertur. Hi sunt ejus effectus. Fluidorum quantitatem minorem

rem reddit, vasaque ipsa relaxat. Sanguinis vim impetumque cohibet. Pulsus tardior atque debilior fit. Sed, quanquam hoc, in principio, remedium fit optimum, cautiùs tamen in progressu morbi usurpandum est. Quod in affectionibus quidem omnibus inflammatoriis, sic in hac etiam, optandum, ut sanguis vulnere satis amplo plenoque rivo effluat; unciaë enim decem hoc modo detractæ, efficaciores esse reperiuntur, quàm unciaë etiam triginta tardè et paulatim missæ. E brachio lateris affecti meliùs detractio fit, iterum iterumque, secundùm ægri vires, repetenda, si, missione primâ præcipue, respiratio minùs difficilis evadat, pulsusque interea durus et validus remaneat, dum crustâ coriaceâ manifestatur. Quòd ad quantitatem attinet, morbi violentia, viriumque ægrotantis ratio iusta, hoc satis ostendent. Plerumque, haud desinendum est, donec cessaverit dolor. Parti dolenti cata-
plasmata

plasmata nonnunquam applicantur ; sed vesicatoria potiora sunt ; et, quoniam hæc venæsectionem minùs utilem reddunt, ea admovere non oportet, donec vena semel, bis, aut sæpius tundatur. Purgatio utilis est, non eò solum quòd febrem magnopere domat, verùm etiam quòd sanguinis impetum a capite atque thorace ad extremitates inferiores convertit. Ad hoc, sales neutri, manna et senna, plerumque administrantur.

Ad indicationem secundam jam perventum est. Medicamenta *Expectorantia* dicta, hìc usurpanda esse videntur. Sed quoniam vix liquet quantopere hæc ægrum juvant, et, ob vim stimulantem, interdum etiam nocere possint, cautè porrigenda sunt. Diaphoretica summis laudibus a nonnullis celebrantur ; sed, ut a CULLENO cel. notatur, corpus nimium stimulant, atque calefaciunt : hæc igitur cautissimè danda sunt. Si aliquando

do adhibeantur, sales neutri aliis anteponuntur. Horum effectus diluentibus, sine caloris auxilio, promovendi. Ad tussim sedandam, somnumque inducendum, opium maximè commendatur. Aquæ tepidæ vaporum inhalatio sæpe profuit ; ab eorum usu, tamen, abstinendum est ; tussim etenim augere videntur. Demulcentia, inter quæ extractum glycyrrhizæ numerandum, interdum profunt.

FINIS.